

Soraarerussutisiaqarnissamut aaqqissuussinermut pinngitsoorani ilaanissaq pillugu Inatsisartut inatsisaat

§ 1. Inuk 18-ileereersimasoq Kalaallillu Nunaannut tamakkiisumik akileraartussaatitaasoq utoqqalinersiaqarneq pillugu Inatsisartut inatsisaanni § 1 naapertorlugu soraarninngornissani tikillugu soraarerussutisiaqarnissamut aaqqissuussinermut akiliisassaaq.

Imm. 2. Akiliisarneq kingusinnerpaamik aallartinneqassaaq ukumi aningaasarsiorfiusumi inuup 18-inik ukioqalerfiata tulliani, ukumilu aningaasarsiorfiusumi pineqartup soraarninngorfissaa nallerpat unitsinneqarsinnaalluni.

Imm. 3. Soraarerussutisiaqarnissamut aaqqissuussineq soraarerussutisiaqarnissamut aningasaateqarfimmi, sillimmasiisarnermik ingerlatsineq pillugu inatsimmi pineqartumi inuunermut soraarerussutisiaqarnissamulluunniit sillimmasiisarfimmi Finanstilsynimit akuersissummik peqarluni sillimmasiisarnermik ingerlatsisumi pilersinneqarsimassaqaq imaluunniit aningaaserivimmi, Kalaallit Nunaanni angerlarsimaffeqartumi imaluunniit aalajangersimasumik ingerlatsiveqartumi kiisalu maani nunami aningaaserivimmik ingerlatsisinnaanissamut Finanstilsynet-imit akuersissuteqartumi.

§ 2. Inuup soraarerussutisiaqarnissamut aaqqissuussineranut ukumi aningaasarsiorfiusumi akiliutit, ileqqaarnissamut tunngavissat 150.000 kr.-iuppata amerlaneruppataluunniit ileqqaarnissamut tunngavissat 4 procentiinit ikinnerussanngillat. Ileqqaarnissamut tunngavissat tassaapput inuup aningaasarsiai A-t B-llu tamarmiusut aningasanik, aningaasarsianit akileraarutit pillugit Inatsisartut inatsisaanni § 41, imm. 2 naapertorlugu aningaasarianut akileraaruteqataasussanut ilanngunneqartussaanngitsunik ilasat, taamaattorli tak. § 4.

Imm. 2. Kisitsit imm. 1-imi taaneqartoq piffissami 2019-imiit 2024-mut ukiumut 1 procentimik qaffattassaaq, kisitsit taamaalilluni 2024-mi 10 procentinngussalluni.

Imm. 3. Imm. 1-imi aalajangersagaq apeqquataatinnagu inuup soraarerussutisiaqarnissamut aaqqissuussinerminut akiliutai, sinneqartoorutit 150.000 kr.-iuppata amerlaneruppataluunniit, namminersorluni inuussutissarsiummik ingerlatsinikkut sinneqartoorutaasa akileraaruteqataasussat 2 procentiinit ikinnerussanngillat.

Imm. 4. Kisitsit imm. 3-mi taaneqartoq piffissami 2019-imiit 2022-mut ukiumut 1 procentimik qaffattassaaq, kisitsit taamaalilluni 2022-mi 6 procentinngussalluni.

§ 3. Kisitsit § 2, imm. 1 naapertorlugu atuuttoq inuit ileqqaarnissamut tunngavissaat 100.000 kr.-iuppata kisitsit 0 procentimiit, inuit ileqqaarnissamut tunngavissaat 150.000 kr.-iuppata kisitsit 100 procentimut assigiaamik qaffakkiartuaassaaq.

Imm. 2. Kisitsit § 2, imm. 3 naapertorlugu atuuttoq inuit sinneqartooraat 100.000 kr.-iuupata kisitsit 0 procentimiit, inuit sinneqartooraat 150.000 kr.-iuppata kisitsit 100 procentimut assigiaamik qaffakkiartuaassaaq.

§ 4. Ileqqaarnissamut tunngavissanik naatsorsuinermi makku naapertorlugit tunniunneqartartut ilanngunneqassanngillat:

- 1) Kalaallit Nunaanni Namminersornerullutik Oqartussani kommuninilu tjenestemandit pillugit Inatsisartut inatsisaat,
- 2) Tjenestemandit Inatsisartut suliffeqarfiini atorfillit pillugit Inatsisartut inatsisaat,
- 3) Naalagaaffimmi tjenestemanditut atorfillit Kalaallit Nunaanniittut pillugit inatsit,
- 4) Inuit annertuumik innarluutillit ikiorserneqartarnerat pillugu Inatsisartut peqqussutaat,
- 5) Meeqqanut tapiissutit pillugit Inatsisartut inatsisaat,
- 6) Meeqqanik inuuusuttunillu ikorsiisarneq pillugu Inatsisartut peqqussutaat,
- 7) Pisortanit ikorsiissutit pillugit Inatsisartut peqqussutaat,
- 8) Utoqqalinermi pensionisiat pillugit Inatsisartut inatsisaat,
- 9) Siusinaartumik pensionisiat pillugit Inatsisartut inatsisaat,
- 10) Inissiani attartukkani ineqarnermut tapiissutit pillugit Inatsisartut inatsisaat, aamma
- 11) Ilinniagaqarnersiutit pillugit Inatsisartut inatsisaat.

Imm. 2. Ileqqaarnissamut tunngavissanik naatsorsuinermi makku aamma ilanngunneqassanngillat:

- 1) meeqqanut akilersuutit, inuup angajoqqaavinit pisortanilluunniit akilerneqartussat, aamma
- 2) pensionisiatut tunniunneqartut allat, Utoqqalinersiaqarneq pillugu Inatsisartut inatsisaanni pineqartunut ilaangngitsut.

§ 5. Soraarerussutisiaqarnissamut aaqqissuussinermut akiliutit, aningaasarsianut akileraaruteqaataasussanut ilanngunneqartussat imaluunniit akiliutit, aningaasarsianit akileraaruteqaataasussanit ilanngaatigineqarsinnaangngitsut ileqqaakkat § 2-mi taaneqartutut naatsorsorneranni akileraarutit ilanngaatigineqartinnagit amerlassusiinut naatsorsoqqinnejassapput.

§ 6. Kialunniit, akileraaruserinermerik ingerlatsineq pillugu Inatsisartut inatsisaanni § 30 a, imm. 1-impiineqanngitsumik pissuteqarluni soraarerussutisiaqarnissamut aaqqissuussinernut akiliuteqarsimasup, ukiumi aningaasarsiorfiusumi qaangiuttumi akiliutaasimasut kingusinnerpaamik 1. maj akileraaruseriffimmut nalunaarutigisassavai.

§ 7. Akileraaruseriffik, inuup soraarerussutisiaqarnissamut aaqqissuussineranut akiliutissat minnerpaaffissaannik § 2-mi taaneqartunik ukiumi aningaasarsiorfiusumi qaangiuttumi akiliisoqarsimanera paasiniarlugu 31. august nallertinnagu naatsorsuissaq.

Imm. 2. Inuup soraarerussutisiaqarnissamut aaqqissuussineranut akiliutissat minnerpaaffissaat inorlugu akiliisoqarsimanera naatsorsuinerup takutippagu, nikingassut 1.000 kr.-init angineruppat akileraaruseriffiup inuk qinnuigissavaa taanna inuup soraarerussutisiaqarnissamut aaqqissuussineranut sap.ak. 4-t qaangiutsinnagit akileeqquullugu, akiliinerlu akileraaruseriffimmut uppernarsaqquullugu.

Imm. 3. Imm. 2-mi piffissaliussaq qaangerneqarpat akileraaruseriffik skattekortimik nutaamik skattebilletsinilluunniit nutaanik sanasinnaavoq, nikingassut procentimut akileraarutissamut tapiliussatut

akiligassiissutigalugu. Tapiliussaq annerpaamik tassaassaaq procentit § 2 naapertorlugu atuuttut.

Imm. 4. Akileraaruseriffiup tapiliussaq, tak. imm. 3, akilerneqartoq inuup soraarnerussutisiaqarnissamut aaqqissuussinieranut ingerlateqqissavaa.

Imm. 5. Inuup soraarnerussutisiaqarnissamut aaqqissuussinermik atuuttumik peqarnera akileraaruseriffimmit ilisimaneqanngippat, akileraaruseriffiup pineqartoq soraarnerussutisiaqarnissamut aaqqissuussinermik pilersitsissussinnaavaa, tak. § 8.

§ 8. Naalakkersuisut piginnaatinneqarput soraarnerussutisiaqarnissamut aaqqissuussinernik akileraaruseriffiup § 7, imm. 5 naapertorlugu pilersitaanik isumaginninnissaq pillugu, soraarnerussutisiaqarnissamut aningaasaateqarfimmut, sillimmasiisarnermik ingerlatsineq pillugu inatsimmi pineqartumut, imaluunniit inuunermut soraarnerussutisiaqarnissamulluunniit sillimmasiisarfimmut, sillimmasiisarfimmik imaluunniit aningaaserivimmik ingerlatsinissamut Finanstilsynimit akuersissumik peqartumut Kalaallit Nunaanni angerlarsimaffeqartumut imaluunniit aalajangersimasumik ingerlatsiveqartumut aamma Finanstilsynimit akuersissummik peqarluni sillimmasiisarnermik ingerlatsisumut isumaqatigiissuteqarnissamut.

§ 9. Inatsisartut inatsisaat 1. januar 2018-imi atortuulissaq.

Namminersorlutik Oqartussat, ulloq 28. november 2016

Kim Kielsen

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviit

Naalakkersuisut

